

Phawuloosa Titos Xaafeez Kiita Gelo

Tito Ayihude baaya, zin guyepp ammanii, Phawuloosa Wonggile kiita oosa oothittar zhame maaqqii eza maaddeez asii. Ye wode Tito, woosa keeth be7adayisinnee naagodayis Qarxeesa biitta atteeza. Yha kiitay hayidzii aafe qofita aykkiza.

1. Woosa keeth aqisiza asay, iita yess yez Qarxeesa asay lanqqayid ab garkk lo77o yess yezodayis beezizako Titona akaakisiza.
2. Woosa keeth gancce yez дума дума cugita, yeykka, cima asita, yelaga na7itannee aylita wayizii tamarssodayis beezizako Titona zoriza.
3. Ammaniza asay ammano yess baz, sarotitharannee siiqor yezod, woosa keeth ganccepp kachcii, palamannee phaliqqithii dhaboday garkk Titos zore inggiza.

Tito kitay aykkeez qofita

Gelo 1:1-4

Woosa keeth kaalithizitay bagga 1:5-16

Woosa keetha yez дума дума cugitay ooso 2:1-15

Zorenee naagiso 3:1-11

Kusitte qofa 3:12-15

¹ Yesuus Kiristtoosa hawaarennee Xooss ayyile maaqqeez, Phawuloosa, xaafeez dabddaabbe.

Xoossii dooreez asay ammana dichchod garkkennee tuma ayyana yess wayizii yessadazako beeziza tuma eretithiko untan kaalithodayis taanii kiitintteeza.

² Ye ammanay medhina de7o ufayssal afa eqqeeza. Yeyi gaame wodepp tiina worddotoowa Xoossay nuus inggod gi qaala geleezaya.

³ Nuna ashshiza Xoossay fa wode hellin yha kiita ododay garkk taas hadara inggeezaya.

⁴ Nuus koththe maaqqeez ammanayid taas tuma na7a maaqqeez Titos,

Xooss Adayppennee nuna ashshiza Yesuus Kiristtoosapp aadho keehetithay, maarotithaynee sarotithay nees maaqqo.

Tito Qarxeesa ootheetz oosa

⁵ Taanii nena Qarxeesa ashshiezay, neenii atteez baz lo7ithod garkkennee taanii kiitteezay garkk katama ubbayid woosa keeth aqisizita doorod garkkesii.

⁶ Woosa keeth cima bornttooza, pettii machchat azin, yeda yessar woy kiitintto ixor asii boroowa ammaniza na7itay yez as maaqqodayis beeziza.

⁷ Woosa keeth aqisizitay Xooss ooso hadara ekeez gishos borinttooza, utirttooza, ellissii yilottooza, mathooza, oda koyoozannee beezoowa adas kukkurooza maaqqodayis beeziza.

⁸ Zini imath makkizaya, lo77o baz ubba qadhdhizaya, akaakar yezaya, suure, geeshshinnee fana haarizaya maaqqodayis beeziza.

⁹ Tuma timirtte tamaarsora, zorerannee ye timirtta ixxitayis mahith inggodayis fa tamaareez ammanthiza qaalayil miinggii eqqoo.

¹⁰ Kiitinttozitay, pathoowa oda odinttizitay, doshshizitay ubbarakka dookalintto woga naagiza gaame asitay yeza.

¹¹ Unttii beezoowa oger miishe denggodayis koyii, beezoowa baz tamaarssittar kara as ubba buqqiz gishos u timirtta teqqodayis beeziza.

¹² Unttapp pettay unttis nabe maaqqeezay, «Qarxeesa asay ubba wode worddo odinttizita; iita do7itannee azaalla nafisaamita»* yeegeeza.

¹³ Yha markkatithay tuma. Yeyi gishos, unttis tuma ammano yezoday garkk untan kaccoytta.

¹⁴ Tuma ixxiza asay timirttanee Ayihuditay pathoowa tossa si7aamay garkk untan miinthe seeroba.

¹⁵ Geeshshitayis ubba baz geeshshii, zin tunitayssinne ammanozitayis u qofayinne kahay tuneez gishos untis abikka geeshshii baaya.

¹⁶ Unttii nu Xooss eriza giza, zin fa oosayir eza kaddiza. Unttii Xoossar ixintteezita, kiitinttoowazitannee lo77o ooso ubba oothodayis piilizita.

2

¹ Zini neenii de7o inggiz timirtta beezizay garkk tamaarssoba.

² Wozantto dhiirathitay fana mooddizita, giigar yezizita, bonchchintteezita, ammanor, siiqorannee dandda7ar, minggod garkk zoroba.

* **1:12** *Qarxeesa asay ubba wode worddo odinttiza; iita do7itannee azaalla yarambbita: Yeyi yeegii odeez nabay Ephimenddesa ginttittiza.*

³ Yeyigarkkekka, woantto maachitay fa yessayid geeshshita, hawozowaziita, ushsh zhaarozitanee lo77o baz taaarizita maaqqoday garkk taaarssoba.

⁴ Unttii yhay garkk haniko yelaga maachchitay fa azinitanee fa na7ita siiqoday garkke.

⁵ Xooss qaalay borinttaamay garkk fana moodizita, geeshshita, fa kara karisizita, keehitanee fa azinis kiitinttizita maaqqad garkk yelaga maachita taamarssoba.

⁶ Yey garkkekka, paanthitay fana haaroday garkk zoroba.

⁷ Neenii ne ommas lo77o ooso ubbayir unttis aaziso maaqqoba. Neenii ne timirttayir eqqorannee ammaninttor nena beezoba.

⁸ Nu morkkitay nuna zigiriz oge dhabin unttii yeellatoday garkk neenii borinttowa lo77o ooso oothoba.

⁹ Ayllitay ubba bazar fa goditayis kiitinttoday garkk, unttan ufayssod garkkennee unttar palamam garkk zoroba.

¹⁰ Unttii fa goditaypp miishe kasttaamay garkk zoroba. Yeykka, nuna ashshiza Xoossay timirtte, ubba oger bonchintteeza maaqqod garkk fa oothiza oosayid folo ammaninttizita maaqqeezana beezoday garkk unttan zoroba.

¹¹ As ubba ashshiza Xooss aadho keehetithay qoncceeza.

¹² Ye aadho keehatithay, nuunii nagaranee yha alamay amo ashshii, yha wodayid nuna mooddii, tuma ayyana yessisinnee xillotithar yezod garkk nuna taamarssiza.

¹³ Nuunii anjjintteez ufayss maaqqeez gita Xoossannee nuna ashshiza Yesuus Kiristtoosa bonchcho qonccitha naagol yeza.

¹⁴ Iita ooso ubbaypp nuna wozodayisinnee lo77o baz oothodayis amottiz paas geeshsha woya mahodayis fana nu gishos aathii inggeeza.

¹⁵ Neenii yhaya tamaarssoba, kunth mawuter zorob, Seeroba oonikka nena leqqippe.

3

Ammaniza as ooso

¹ Asay gade aqisizitayisinnee, mawuter yezi-tayis moodinttod garkk, haayotithar kiitinttodayisinnee lo77o ooso ubba oothodayis giigintteezita maaqqoday garkk qopisoba.

² Ma untii oollakka iita odinttaamay garkk, saro as maaqqod garkk, ashikkitannee as ubbayis keehizita maaqqod garkk zoroba.

³ Nuunii tiina boozita, kiitinttoozitta, balintteezita, duma duma asho ufayssisinnee amos ayllitteezita. Nuunii iitatitharannee qinaater kumeezita; nu as ixizita, asikka nuna ixizita.

⁴ Zini dhale maaqqeez Xooss keehetithannee siiqqay qoncciez wode

⁵ nu oothiez geeshsha oosay gishos baazin fa maarotithay gishos nuna ashsheeza. E nuna ashsheezay, nam7antho yelintto meecharannee Geeshsha Ayyana baggar inggeez oroth yessara.

⁶ Ye Ayyana, Xoossii nuna ashshiza Yesuus Kiristtoosa baggar nuul afa gaanthii gogiseeza.

⁷ Fa aadho kee hetithay baggar nuna xillisii medhina de7o laata ufayassa ekkod garkk yeya ootheeza.

⁸ Yha qaalay ammanintteezaya. Xooss ammanizitay lo77o ooso oothodayis giigeezita maaqqod garkk ne yha qaala miinthii odod garkk ta koyiza. Yeyititay as ubbayis lo77onnee maaddizita.

⁹ Zini boozitay palamayppe, kochche taybopp, kachchapennee higgepp denddeezayid denddiza cachapp naaginttoba. Yeyi maaddoowa wodhe baa bazi.

¹⁰ Phalqqithi medhdhiza atha pettii toke woy nam7i toke zorii yeypp guye yey garkk athaypp haakkoba.

¹¹ Yey garkk as zhucannee nagaranchcho; E faal afa pirddeezana eroba.

Wurssith zore

¹² Taanii balggo ezayid shaaccodayis qoppeez gishos Arxemaasa woy Tikiqoosa neeko kiittiza wode ne taako Niqophiloona ye7odayis minggoba.

¹³ Higge eriz Zeenasannee Aphiloosa oge yhanigodar untis koshshiza baz paccaamaygarkk untan maaddoba.

¹⁴ Nu asaykka pathoowa as maaqqii attamay garkk paas beeziza baz denggoday garkk lo77o ooso oothodayis miinggii tamaaro.

¹⁵ Taara yez ubbay nena saro giza; ammanor nuna siiqiza asita saro goba.

Xooss aadho kee hatithay yi ubbayira maaqqo. Amin77ii.

Oroth Caago **Melo New Testament Latin Version**

copyright © The Word for the World International

Language: (Melo)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

95113415-a3bd-5069-be47-fe8016d2f076